

Sajak

Pahlawan Islam

Oh! Kesatria.
Bangunlah.
Lihat...
Bangsamu bercakaran.
Ciptaan Muḥammad disepak terajang.
Undang-undang Tuhan dibakar dijala celaka.

Umatmu semua membisu.
Tiada siapa berani membuat lagu.
Takut dihumban ke telaga neraka.

Bangunlah...!
Oh! Pahlawan Islam tercinta.
Renunglah terhadap agamamu.
Awan hitam datang ke bumi ini.
Mana pahlawan pembelanya?

Tegaklah bendera.
Di dada kau penuh ilmu perwira.
Punahkan syaitan perosak umat kita.
Jangan membiar bermaharajalela.

Kami semua rindu perjuanganmu.
Berjuanglah kau kesatria Islam.
Rakanmu banyak berguguran.
Janganlah kau gentar.
Belalah agamamu.

Andainya nyawa kau direbut.
Jasamu bertaburan di merata bumi.
Pusaramu harum sepanjang zaman.

Rahim S.A.
Pulau Pinang

Surat Kepada Nasser

(i)
Kelmarin tersebarnya berita
Tentang perjuangan Umat Arab
Dan umat Islam seluruhnya
Dengan satu ikatan: di Khartoum!

Ah, pun demikian
Ada kocakan di dalam cawan
Menggoncang perpaduan
Antara umatmu sendiri.

(ii)
Hai, kaudengarlah
Ini bicara untukmu
Dengan rasa keinsafan dan keazaman
Dari para umat yang merasa kehampaan.

Percayalah! kekuatan ada pada diri
Dalam keteguhan iman dan perpaduan
Antara umatmu dan dunia Islam seluruhnya
Di bawah tertiakkan¹: Tuhan Maha Besar!

Dan, inilah suatu kepercayaan
Tentang perjuangan umat-umatmu
Dengan umat-umat yang simpatinya tertimbun
Dalam harapan: kemenangan dan puncaknya dipastikan.

(iii)
Percayalah dengan kekuatan diri dan hati
Tentang perjuangan yang paling hakiki
Atas umatmu dan umat Islam seluruhnya
Dalam suatu ikatan yang dimeterai:
Konferensi Khartoum!

Tinta Hijau
Bandar Brunei.

¹ Perkataan sebenar ialah teriakan.